

Transkription von Urkunde HAL 1388a

Ort, Datierung: Halle, 1388-03-08

Signatur: Universitäts- und Landesbibliothek Halle, Yla 27 180r [\[online\]](#)

Inhalt: Werner von Bodendike: Schuldbrief

Ek werner von Bodendike Bekenne vor my vnde myne erue(n) / dat ek schuldich 'Bin rechter schult
segebande von odbernshusen vnd(e) / sine(n) erue(n) nege(n) vnde twintich mark luneborger pen(n)ige
de ek ome / Betalen schal vnde wille nu to Pinxste(n) dede negest to komende sint / ane jengerleige
list hinder efte vortoch To Beterer wissende sette / ek ome to borge(n) myne(n) frund de hir na
gescreue(n) steyd Ek werner / von odbernshuse(n) Bekenne in dessem sulue(n) breue dat ek hebbe
gelou(ed) / vnde loue entruwe(n) vor wernere von Bodendike vnde sine erue(n) vnde / mid one
segebande von odbernshuse(n) vnde sine(n) erue(n) nege(n) vnde twintich / mark luneborger pen(n)ige
to betalende in allerwise alze vorgescreue(n) / is mid redem gelde eder mid genogede(n) pande(n) dar
he sines geldes / midde bekome(n) konne(n) dat ek sakwoldege vnde Borge alle desse / vorsc(reuen)
stucke stede vast vnde vnvorbroken holden schulle(n) vnde wille(n) / ane jegerleyge list hinder eder
vortoch dat loue we entruwe(n) vnde / hebb(en) des to orkunde vnde to eyner apenbare(n) bewisinge
vnse Jng(esegele) / gehengt late(n) an dessen Breff na der Bort Cristi dretteynhundert . jar / in deme
achte vnde achtentegeste(n) jare des sondages to miduasten /